

Edwina Henriquez:

‘Medidanan di gobierno MEP-POR-RED contra pueblo lo tin efectonan devastador riba esnan mas vulnerable den comunidad’

ORANJSTAD - Gobierno di MEP-POR-RED bao liderazgo di Minister-President Evelyn Wever-Croes ta bay introduci medidanan devastador contra e Pueblo di Aruba cual medidanan lo drenta na vigor dia 1 di April 2020. Gobierno di MEP-POR-RED bao di liderazgo di Evelyn Wever-Croes ta doño di e medidanan aki, cual lo bay asota e Pueblo di Aruba na forma devastador ya cu e Pueblo di

Aruba no por carga ni un aumento mas sin cu esaki lo afecta su capacidad di compra. Durante campaña e lider di MEP, Evelyn Wever-Croes a bisa e Pueblo di Aruba cu e

tin e solucion pa baha e debe di Gobierno di Aruba sin cu Gobierno mester tuma medida a cambio di e sosten di e Pueblo di Aruba.

Na November 2017 Evelyn Wever-Croes a forma un Gobierno MEP-POR-RED y ya caba ta gobernando e pais aki pa 2 añ a y 4 luna. Mesora cu MEP-POR-RED a bin na mando a subi e BBO y awor e ta 6%. Na e momento ey Evelyn Wever-Croes por a bende e Pueblo di Aruba cu e medidanan tabata necesario, pasobra ex Minister president Mike Eman a laga Aruba cu un desaster financiero. Gobierno di MEP-POR-RED a priminti di baha gastonan y stop di paga placa na edificio-

nan y na abogado.

Awe despues cu MEP-POR-RED bao guia di Evelyn Wever-Croes ta goberna Aruba pa 2 añ a y 4 luna, e medidanan cu Gobierno di MEP-POR-RED ta tuma awor contra e Pueblo no por wordo bisa mas cu nan ta bin dor di e Gobierno anterior, pasobra Pueblo di Aruba a huur Evelyn Wever-Croes y su Gabinete su servicionan pa goberna e pais aki na forma decente, pero kico Evelyn Wever-Croes y su Gabinete a haci? Emplea decenas di famia y amigonan; duna Papa miles y miles di florin na ganashi como abogado di Gobierno y asina nos por sigui; tur e decisionnan aki ta pa

enrikece famia y amigonan a custia di e Pueblo di Aruba. Awor Gobierno di MEP-POR-RED ta bay bin cu e ultimo cuchiu den lomba di e Pueblo di Aruba y e ultimo medidanan aki, cualnan lo aumenta e BBO no cu 6% hacie 12%, pero esaki lo bira 24% ya cu tur comerciante lo haya ta bon pa hisa nan prijs na nan antoho sin cu Gobierno por controla esaki.

Evelyn Wever-Croes ta propaganda su mes como un persona cu ta stima Dios y ta ricibi e Santa Comunión frecuentemente y al mismo tiempo por stima placa asina hopi y na mesun momento ta tuma medidanan contra e Pueblo di Aruba a sabiendas

cu esaki lo causa cu muchanan chikito lo bay drumi sin come; cu ancianonan lo bay drumi sin come; cu e medidanan aki lo causa un brote di problemaman social na Aruba cu e consecuencia cu esnan mas vulnerable den nos comunidad lo wordo malamente afecta.

Como Abogado pa Derechonan Humano mi ta condena energicamente e decision di Gobierno di MEP-POR-RED encabesa pa Minister President, Evelyn Wever-Croes pa tuma medidanan contra e Pueblo di Aruba ya cu e medidanan aki lo bay tin efectonan devastador pa esnan mas vulnerable den nos comunidad.